



Sud Bosne i Hercegovine

Krivično odjeljenje – Odjel I za ratne zločine

Saopćenje za javnost

Datum, 17.1.2022.

Broj predmeta: S1 1 K 029228 21 Krž 20

Ime: Rade Garić

Br: 22-01/4940

Otpremljena drugostepena presuda u predmetu Rade Garić

Vijeće Apelacionog odjeljenja Suda Bosne i Hercegovine je dana **29.11.2021.** godine donijelo, a **29.12.2021.** godine otpremilo, drugostepenu presudu u predmetu **Rade Garić**, kojom je kao neosnovana odbijena žalba Tužilaštva Bosne i Hercegovine, dok je žalba branioca optuženog **Radeta Garića** djelimično uvažena, pa je presuda Suda Bosne i Hercegovine od **16.8.2021.** godine preinačena u pogledu odluke o krivičnopravnoj sankciji, na način da je optuženi **Rade Garić** osuđen na kaznu zatvora u trajanju od **17 (sedamnaest) godina** za krivično djelo zločini protiv čovječnosti iz člana 172. stav 1. tačka h) u vezi sa tačkama a) ubistvo, e) zatvaranje ili drugo teško oduzimanje fizičke slobode suprotno osnovnim pravilima međunarodnog prava, i) prisilni nestanak osoba i k) druga nečovječna djela slične prirode, učinjena u namjeri nanošenja velike patnje ili ozbiljne fizičke ili psihičke povrede ili narušenja zdravlja, sve u vezi sa članom 29. i članom 180. stav 1. Krivičnog zakona Bosne i Hercegovine, za koje djelo je prvostepenom presudom oglašen krivim, na osnovu odredbi članova 39., 42. stav 1. i 2., 48. stav 1. i 2. i 49. Krivičnog zakona Bosne i Hercegovine. Protiv ove presude žalba nije dozvoljena.

Prvostepenom presudom od **16.8.2021.g.** optuženi **Rade Garić** je oglašen krivim za počinjenje krivičnog djela zločini protiv čovječnosti iz člana 172. stav 1. tačka h) u vezi sa tačkama a), e), i) i k), sve u vezi sa članom 29. i članom 180. stav 1. Krivičnog zakona Bosne i Hercegovine, kojom presudom je Sud optuženom **Radetu Gariću** izrekao kaznu zatvora u trajanju od **20 (dvadeset) godina**.

Ured za odnose sa javnošću
+387 33 707 164/165/178/194 ili PIOS@sudbih.gov.ba

Istom presudom optuženi **Rade Garić** oslobođen je optužbe za pojedine inkriminacije kako je to naznačeno u presudi, čime bi počinio krivično djelo zločini protiv čovječnosti iz člana 172. stav 1. tačka h) u vezi sa tačkama g) i i) Krivičnog zakona Bosne i Hercegovine, sve u vezi sa članom 29. i 180. stav 1. istog Zakona.

Optuženi **Rade Garić** je oglašen krivim što je u periodu od početka aprila do kraja 1992. godine, u opštini Vlasenica, u okviru širokog i sistematičnog napada srpskog Opštinskog štaba Teritorijalne odbrane Vlasenica, paravojnih formacija, Vojske Srpske Republike Bosne i Hercegovine, kasnije Vojske Republike Srpske, Ministarstva unutrašnjih poslova Srpske Republike Bosne i Hercegovine, odnosno Republike Srpske i dijelova Jugoslovenske narodne armije i to Novosadskog korpusa JNA, usmjerenog protiv bošnjačkog civilnog stanovništva opštine Vlasenica, znajući za takav napad i da njegove radnje čine dio tog napada, počinio progon bošnjačkog civilnog stanovništva opštine Vlasenica na političkoj, nacionalnoj, kulturnoj, etničkoj i vjerskoj osnovi ubistvima, zatvaranjem ili drugim teškim oduzimanjem slobode suprotno osnovnim pravilima međunarodnog prava, prisilnim nestancima osoba i drugim nečovječnim djelima slične prirode učinjenih u namjeri nanošenja velike patnje ili ozbiljne fizičke ili psihičke povrede ili narušenja zdravlja.

Optuženi **Rade Garić** je oglašen krivim i što je za vrijeme širokog i sistematičnog napada, koji su u periodu od 6.7. do kraja augusta 1995. godine preduzimali Vojska Republike Srpske i Ministarstvo unutrašnjih poslova Republike Srpske, usmjerenog protiv civilnog bošnjačkog stanovništva zaštićene zone UN Srebrenica, u svojstvu komandira interventnog voda u sastavu Vlaseničke brigade, znajući za takav napad i da njegove radnje čine dio tog napada u okviru kojeg je izvršen progon i djelimično istrijebljena skupina bošnjačkog naroda, pri čemu je cjelokupno bošnjačko civilno stanovništvo, do 40.000 civila Bošnjaka, uklonjeno iz zaštićene zone UN Srebrenica, a više od 8.000 muškaraca Bošnjaka i dječaka ubijeno, počinio progon civilnog bošnjačkog stanovništva preduzimanjem inkriminiranih radnji okvalifikovanih kao druga nečovječna djela slične prirode učinjena u namjeri nanošenja velike patnje ili ozbiljne fizičke ili psihičke povrede ili narušenja zdravlja iz člana 172. stav 1. tačka h) KZ BiH, u vezi sa tačkom k) istog Zakona, a sve u vezi sa članom 29. i članom 180. stav 1. KZ BiH.
